

# **Odluka kojom se produžuje mandat likvidacionom upravniku “Privredne banke a.d. Srpsko Sarajevo”**

**Koristeći se** ovlaštenjima koja su visokom predstavniku data u članu V Aneksa 10. (Sporazum o implementaciji civilnog dijela mirovnog ugovora) Općeg okvirnog sporazuma za mir u Bosni i Hercegovini, prema kojem je visoki predstavnik konačni autoritet u zemlji u pogledu tumačenja gore navedenog Sporazuma o implementaciji civilnog dijela mirovnog ugovora; i posebno uzevši u obzir član II 1. (d) istog Sporazuma prema kojem visoki predstavnik “pomaže, kada ocijeni da je to neophodno, u rješavanju svih problema koji se pojave u vezi sa implementacijom civilnog dijela mirovnog ugovora”;

**Pozivajući se** na stav XI.2 Zaključaka Konferencije za implementaciju mira održane u Bonu 9. i 10. decembra 1997. godine, u kojem je Vijeće za implementaciju mira pozdravio namjeru visokog predstavnika da iskoristi svoj konačni autoritet u zemlji u vezi sa tumačenjem Sporazuma o implementaciji civilnog dijela mirovnog ugovora, kako bi pomogao u iznalaženju rješenja za probleme u skladu sa gore navedenim “donošenjem obavezujućih odluka, kada ocijeni da je to neophodno”, o određenim pitanjima, uključujući i (prema tački (c) stava XI.2) “mjere kojima se osigurava implementacija mirovnog sporazuma na cijeloj teritoriji Bosne i Hercegovine i njenih entiteta”;

**Zapažajući** značaj koji je međunarodna zajednica pridala pravilnom upravljanju bankovnim sistemom u Bosni i Hercegovini, kao sastavnom dijelu procesa implementacije mira;

**Konstatujući**, u vezi sa primjerom pomenutog pridavanja važnosti, da je Vijeće za implementaciju mira na konferenciji održanoj u Londonu 4. i 5. decembra 1996. godine pozdravio riješenost vlasti u Bosni i Hercegovini da usvoje zakone u oblastima poput, pored ostalog, i oblasti bankarstva; nadalje konstatujući član 44.a) Deklaracije sa sastanka na nivou ministara Upravnog odbora pomenutog Vijeća, održanog u Luksemburgu 9. juna 1998. godine, a na kojem je Odbor istakao da bi oba entiteta trebalo da usvoje nove zakonske propise u oblasti bankarstva; te nadalje konstatujući i poziv upućen vlastima Bosne i Hercegovine od strane pomenutog Vijeća, na zasjedanju održanom u Briselu 23. i 24. maja 2000. godine, da usklade, širom zemlje, svoj pristup u velikom broju područja, uključujući i bankarstvo;

**Podsjećajući** da je “Privredna banka a.d. Srpsko Sarajevo” stavljena pod privremenu upravu odlukom Agencije za bankarstvo Republike Srpske od 20. juna 2003. godine;

**Imajući na umu** ostavku privremenog upravnika, kojeg je imenovala Agencija za bankarstvo Republike Srpske u maju 2004. godine, nakon fizičke prijetnje i napada izvršenog protiv tog lica, kao i imenovanje privremenog upravnika “Privredne banke a.d. Srpsko Sarajevo” **Odlukom visokog predstavnika br. 216/04 od 8. juna 2004. godine;**

**Konstatujući takođe** Odluku visokog predstavnika br. 299/04 od 7. novembra 2004. godine na osnovu koje je «Privrednoj banci a.d. Srpsko Sarajevo» oduzeta dozvola za rad, u skladu s kojom je započeti stečajni postupak od strane privremenog upravnika;

**Imajući na umu** izvještaj privremene upravnice «Privredne banke a.d. Srpsko Sarajevo» od 8. maja 2006. godine u kojem obavještava Agenciju za bankarstvo Republike Srpske i visokog predstavnika da je «Privredna banka a.d. Srpsko Sarajevo» zbog prodaje stečene imovine i prikupljenih značajnih sredstava putem naplate dugova solventna od 30. aprila 2006. godine, i u kojem privremena upravnica predlaže likvidaciju «Privredne banke a.d. Srpsko Sarajevo»;

**Takođe konstatujući** da je 12. maja 2006. godine odlukom Osnovnog suda u Bijeljini, na zahtjev privremene upravnice a u svjetlu solventnog položaja, «Privredna banka a.d. Srpsko Sarajevo», povučena iz stečajnog postupka;

**Vodeći računa o** Odluci visokog predstavnika br. 17/06 od 21. juna 2006. god. prema kojoj je pokrenut postupak likvidacije “Privredne banke a.d. Srpsko Sarajevo” i, na pismeni zahtjev Agencije za bankarstvo Republike Srpske od 12. i 19. maja 2006. godine, imenovan likvidacioni upravnik ove banke;

**S obzirom** na plan primopredaje, koji je izradio likvidacioni upravnik na zahtjev visokog predstavnika, od 25.

septembra 2006. godine, u kojem su date pojedinosti o svim preduvjetima i neophodnim zadacima koji se moraju realizovati prije nego što bude omogućena primopredaja «Privredne banke a.d. Srpsko Sarajevo» Agenciji za bankarstvo Republike Srpske;

**Uzimajući u obzir** pismeni zahtjev Agencije za bankarstvo Republike Srpske od 29. septembra 2006. god, u kojem navedena agencija traži od visokog predstavnika da produži mandat likvidacionom upravniku «Privredne banke a.d. Srpsko Sarajevo» i osigura da se likvidacioni postupak može nastaviti neometano;

**Takođe imajući na umu** da je trajanje mandata likvidacionog upravnika, utvrđenog na osnovu odredbi u Odluci visokog predstavnika br. 17/06 od 21. juna 2006. godine i produženog Odlukom visokog predstavnika br. 24/06 od 30. avgusta 2006. godine, nedovoljno za realizaciju planiranih aktivnosti koje predstavljaju preduvjet za primopredaju «Privredne banke a.d. Srpsko Sarajevo» Agenciji za bankarstvo Republike Srpske radi mogućeg nastavka likvidacionog postupka;

**Svjesni** potrebe da se osigura da likvidacija «Privredne banke a.d. Srpsko Sarajevo» sada započne efikasno i bez nelegitimnog spoljnog uticaja;

**Uzevši u obzir i razmotrivši** sveukupnost prethodno pomenutih pitanja, ovim donosim i zahtijevam da se objavi sljedeća:

## **Odluka**

### **kojom se produžuje mandat likvidacionom upravniku "Privredne banke a.d. Srpsko Sarajevo"**

#### **Član 1.**

Ovom odlukom produžava se mandat gđi Tobi Robinson na funkciji likvidacionog upravnika "Privredne banke a.d. Srpsko Sarajevo" na koji je imenovana Odlukom visokog predstavnika br. 17/06 («Službeni glasnik Republike Srpske», br. 63/06) i koji je prethodno produžen Odlukom visokog predstavnika br. 24/06 («Službeni glasnik Republike Srpske», br. 89/06).

Mandat likvidacionog upravnika nastavlja se sve dotle dok visoki predstavnik drugačije ne odluči.

#### **Član 2.**

Gđa Tobi Robinson i dalje postupa kao likvidacioni upravnik pod istim uvjetima koji su ustanovljeni i utvrđeni Odlukom visokog predstavnika br. 17/06 od 21. juna 2006. godine o pokretanju likvidacionog postupka i imenovanju likvidacionog upravnika "Privredne banke a.d. Srpsko Sarajevo".

#### **Član 3.**

Radi otklanjanja svake sumnje, ovim se izričito izjavljuje i ukazuje da je ovdje sadržane odredbe, svaku od njih, utvrdio visoki predstavnik u skladu sa svojim međunarodnim mandatom i da se, stoga, ne mogu osporavati pred sudovima Bosne i Hercegovine ili entiteta ili bilo gdje drugo, kao i da se u vezi sa dužnostima koje se vrše u skladu sa ovom odlukom ne može pokrenuti postupak pred bilo kojim sudom u bilo koje vrijeme nakon njenog donošenja.

#### **Član 4.**

Ova odluka stupa na snagu odmah i odmah se objavljuje u "Službenom glasniku Republike Srpske".

*Sarajevo, 30. septembar 2006.*

*Dr. Christian Schwarz-Schilling*

*Visoki predstavnik*